

Izveštaj sa 19. sjednica Općinskog vijeća Ilijaš

19. put od konstituisanja, 28. maja sastalo se Općinsko vijeće Ilijaš. Nakon što je usvojen Zapisnik sa prethodne sjednice Općinskog vijeća, u sklopu vijećničkih pitanja i inicijativa vijećnica g. Marioneta Ilić-Jureta je u vidu zaključka predložila da vijećnici današnje vijećničke dnevnicе izdvoje za poplavama pogođena područja, što je jednoglasno usvojeno. U okviru treće tačke dnevnog reda vijećnicima i prisutnim je predočena Informacija o posljedicama izazvanim velikim kišnim padavinama u periodu 14.05.2014.-27.05.2014. godine na području Općine Ilijaš. Informaciju je izlagao pomoćnik načelnika u Službi za civilnu zaštitu g. Zdravko Barić, koji je istakao "da je u vrijeme padavina bilo angažovano 50 i 100 ljudi koji su vršili ručno čišćenje kanala, odvodnjavanje, te druge poslove iz oblasti zaštite i spašavanja, a također su svakodnevno bile angažovane mašine za raščišćavanje puteva, uređenju korita i prilaza do kuća, farmi i drugih objekata. Privremeni smještaj jedne porodice obavljen je u Donjim Čevljanovićima, i za 4 porodice u Malešićima, a nakon kraćeg zadržavanja vraćeni su u svoje kuće. Na svu sreću ljudskih žrtava nije bilo, pričinjena je veća materijalna šteta, aktivirala su se brojna klizišta, nastali odroni. Trenutno je angažovana općinska Komisija na procjeni šteta, i do sad je ova Komisija zaprimila oko 40 zahtjeva, dok su na novonastala klizišta na području MZ Srednje izlazili predstavnici Zavoda za izgradnju Kantona Sarajevo u saradnji sa predstavnicima Geološkog zavoda iz Zagreba". Prisutnim se po ovoj tački dnevnog reda obratio i Općinski načelnik g. Akif Fazlić, koji je istakao: "da smo se uspjeli odbraniti u periodu padavina i poplava zahvaljujući punom angažmanu stanovništva. Svi smo shvatili veličinu problema i taj angažman je onda došao sam po sebi. Pohvalio bi organiziran i koordiniran rad institucija, u onakvim uslovima nismo imali prekid vodosnadbijevanja, gotovo sve putne komunikacije su bile prohodne. U narednom period predstoji nam sanacija makadama, već smo pokrenuli izradu projekta za sanaciju vodotoka Ljubina i taj projekat bit će završen naredne sedmice. Preko Direkcije za ceste Kantona Sarajevo sanirat ćemo put za Povorću i Ljubinu. Zavod za izgradnju Kantona Sarajevo je vršio analizu klizišta na području Općine Ilijaš i Vogošće i oni će u narednom periodu ocjeniti stanje i u skladu sa prioritetima sanirati pojedina klizišta. Problem neće biti ni lako ni jednostavno riješiti. Zahvalio bi se i građanima koji su pomagali građanima pogođenim poplavama i u drugim Općinama. Sa 17 glasova za usvojena je Odluka o privremenom korištenju javnih površina na području Općine Ilijaš.

Javne površine na području Opštine Ilijaš dijele se na Nultu, Prvu, Drugu i Treću zonu. Predviđeno je da se dodjela lokacija za privremeno korišćenje javnih površina za postavljanje kioska, slobodnostojećih otvorenih bašti, slobodnostojećih displeja i reklamnih panoa vrši putem javnog oglasa na osnovu urbanističko-tehničkih uslova Službe za prostorno uređenje i stambeno-komunalne poslove

Primjera radi, naknada za postavljanje kioska mjesečno po 1 m² iznosi: Prva zona - 10,00
Druga zona - 8,00 KM i Treća zona 5,00 KM.

Naknada za postavljanje slobodnostojeće otvorene bašte, mjesečno po 1 m² iznosi:

Nulta zona 6,00 KM, Prva zona 5,00 KM, Druga zona 4,00 KM, Treća zona 3,00 KM.

Naknada za postavljanja displeja i slobodnostojećih reklamnih panoa, mjesečno po 1 m² površine panoa, ili displeja iznosi: Prva zona 15,00 KM, Druga zona 10,00 KM i treća zona 5,00 KM. Naknada za plakatiranje na nosačima koji su montirani na stubove javne rasvjete kojima raspolaže Opština Ilijaš za jedan dan po jednom plakatnom mjestu iznosi: Prva zona 5,00 KM, Druga zona 3 KM, Treća zona 2,00 KM.

Prijedlog Odluke o davanju saglasnosti za zaključenje Ugovora o korištenju gradskog nogometnog stadiona u Ilijašu, povučen je s dnevnog reda.

Jednoglasno je usvojen prijedlog Odluke o odbijanju ponude o preuzimanju neizgrađenog građevinskog zemljišta

Pozitivno mišljenje Općinskog vijeća dobio je i Plan realizacije šumsko-privredne osnove za 2014. godinu za Općinu Ilijaš, dostavljen od strane Ministarstva privrede Kantona Sarajevo.

Usvojena su i rješenja iz imovinsko-pravne oblasti, te Informacija o izvršenju Budžeta Općine Ilijaš za period 01.01.-31.03.2014. godine i Informacija iz oblasti šumarstva i eksploatacije kamena primljene su k znanju.

Ukupno ostvareni prihodi za izvještajni period, kako je prethodno navedeno, su 1.703.311,00 KM. Dakle, prihodi od poreza u prvom kvartalu tekuće godine, a u odnosu na planiranu veličinu na godišnjem nivou su ostvareni u procentu od 65%, a neporezni prihodi su ostvareni u procentu od 23% u odnosu na plan.

Tekući transferi su ostvareni u iznosu od 431.421,00 KM, što u odnosu na plan Budžeta općine Ilijaš za 2014. godinu predstavlja izvršenje od 8%. Ukupni izdaci ostvareni u izvještajnom periodu iznose 1.710.845,00 KM, što predstavlja 18% ostvarenja ukupno planiranih izdataka na godišnjem nivou.